

# Galicia Encantada



ANIVERSARIO  
2005 \* 2025  
Enciclopedia de Fantasia Popular de Galicia

REVISTA (ISSN 1887-2859)

*nº 04 (2008).-SEIXO PASTOR, Marcos: O caso da capadora de Cuntis*

Título: O caso da capadora de Cuntis

Autor: Marcos SEIXO PASTOR

Revista de Investigación 4, ano 2008. ISSN 1887-2859

---

Quero comezar reproducindo a composición que nos deu pé para elaboración deste traballo. Trátase dunhas coplas de carácter narrativo que poderíamos encadrar dentro dun xénero tan característico da nosa cultura como é o romance popular, aínda que neste caso non se trata, como veremos, dun texto de carácter anónimo, como era habitual na maior parte daquelas curiosas historias, baseadas en acontecementos reais que, por feiras e romarías de todo o país, ían cantando os nosos cegos, acompañados das notas estridentes das súas zanfonas ou violinos, e tamén do peculiar cartaz (a maltraña) no que o seu moicante, ía sinalando as viñetas correspondentes aos sucesos que se narraban en cada estrofa.

## ROMANCE DEL CRIMEN DE CUNTIS

Oigan todos los que escuchan  
una historia verdadera

ocurrída hace tres años  
entre una garrida hembra  
y un hombre de mala vida  
y de costumbres perversas  
entregado siempre al vicio  
al juego y la borrachera  
que recibió al fin el castigo  
de sus culpas en la tierra  
dejando sus atributos  
en unas manos honestas  
que debajo de la manta  
esgrimían la barbera.

Oh Madre del Redentor  
soberana Providencia  
dame la divina luz  
para que estas coplas  
sean ejemplo de los castigos  
que el cielo siempre reserva  
con la justicia divina  
a los tigres y panteras  
que con figura de hombres  
no respetan a las doncellas  
ni a las mujeres casadas  
que tienen el macho fuera.

En el sulfuroso pueblo  
de Cuntis fue la trijedia.

Habitaba en una casa  
cercana a la carretera  
una mujer bien formada  
y bien armada de caderas  
con dos lunares rizados  
en la mejilla derecha

y un contorno pectoral  
de enorme circunferencia.

Además de esto tenía  
a su marido en América  
en donde era fabricante  
de peines y de peinetas  
construidos con los cuernos  
de toros y de terneras.

La mujer allí vivía  
llevando una buena vida  
sin dar nada que decir  
ni que jamás se oyera  
mormurar al vecindario  
ni del Capellán ni de ella.

Pero un monstruo desalmado  
sin corazón ni vergüenza  
vecino del mismo pueblo  
llamado Xan da Panela  
apostó con unos amigos  
que tenía en la taberna  
que era capaz una noche  
a presentarse ante ella  
y a hacerla soñar gustoso  
con el que estaba en América.

Una vez puestos de acuerdo  
se formalizó la apuesta.  
Y aquel malvado de Xan  
cogió al hombro una escalera  
fue sigiloso a la casa  
y topó la ventana abierta  
y saltando así de pronto  
al cuarto de la interfecta

a su víctima sorprende  
dormitando a pierna suelta.

Ella al sentir los pasos despierta  
y trata de levantarse  
pero al momento se acuerda  
que gasta camisa corta  
y se queda por vergüenza  
diciéndole: Creiminal  
¿Qué quieres? ¿Qué horas son estas  
de venir a asovallar  
a la mujer más honesta  
de Cuntis y sus contornos?  
Márchate al punto y no vuelvas.

El sin querer escuchar  
los gritos y las protestas  
de aquella infeliz mujer  
tiró al suelo la chaqueta  
y quedándose desnudo  
compartió el lecho con ella.

Entonces la desdichada  
al verse junto a la fiera  
con el mayor disimulo  
echó mano a la barbera  
que siempre llevaba oculta  
para su propia defensa  
y fingiendo una caricia  
hizo ris-ras con la izquierda  
y segó de un solo tajo  
dado con mucha firmeza  
todo lo más inflamable  
del bribón Xan da Panela.

De repente se oye un trueno  
y una voz profunda y hueca  
que decía: Por morral  
por cochino y sinvergüenza  
quedas como Putifar  
para en *vitam aeternam*.

Entonces él dijo:  
Virgen de Moraña  
te imploro por Dios clemencia  
y haz que al punto me retoñe  
lo que me ha podado esta.

## **DOUS ASUNTOS CON SEMELLANZAS**

Alá polo ano 1994 sorprendíannos as páxinas de revistas e xornais de todo o mundo cunha curiosa noticia referente a un insólito suceso acaecido nos Estados Unidos de América, onde unha muller de a penas vinte e catro anos, Lorena Bobbit, farta das continuas agresións e abusos sexuais do seu marido, decidiu tomarse a xustiza pola súa man. E así mentres o seu cónxuxe durmía placidamente despois de ter consumada unha das xa habituais violacións, a muller, sen dubidalo cortoulle o pene dunha certa e limpa coitelada. O caso acadou tal difusión que Lorena Gallo -que tomou de novo o nome de solteira despois de divorciarse de John Bobbit- chegou a converterse, durante un tempo, nun símbolo vivinte, representativo da rebeldía radical da muller na defensa da súa dignidade. Despois de ser xulgada foi absolta da acusación de "lesión voluntaria" ao ser recoñecida como "insana mental". O asunto presenta certas similitudes con outro caso sucedido a comezos do século XX nunha parroquia do concello de Cuntis, tal como aínda recordan algunhas persoas do lugar, e que chegou a ser literaturizado polos irmáns Rey Posse de Vilagarcía, no romance reproducido arriba; composición que foi representada no teatro da vila arousá polos anos trinta. Aínda que a popularidade dos feitos foi notoria, non só en Cuntis senón tamén noutros concellos próximos, as limitacións na capacidade divulgativa naqueles tempos e a menor atención dos medios por estes asuntos morbosos que hoxe producen espectaculares aumentos de vendas, neste caso nin a muller nin o seu atacante puideron encher o peto a base de vender exclusivas ou facer anuncios publicitarios. O home quedou capado para sempre e ela tivo que pasar unha tempada na cadea.

Outra sorte correu, no entanto, o castrado violador de Lorena, para quen a mutilación, lonxe de deixalo convertido para sempre nun eunuco como "castigo de sus culpas en la tierra" infrinxido pola "justicia divina", como dirían os irmáns Rey Posse, supúxolle fama e fortuna, pois disque actualmente, despois de terse reimplantado o órgano seccionado, gaña folgadoamente a vida no seu esperpéntico país como actor de películas

pornográficas. Agora ben, imos ao tema que nos ocupa. Na súa poética versión do crime de Cuntis, os irmáns Rey cometen algunhas grallas no tocante aos feitos, que poderían deberse, ben a que non os coñecían directamente, senón quizais a través da prensa, ou ben a que quixeron deformar a historia por motivos literarios, morais ou de calquera outra índole. No romance relátasenos como unha honesta muller que tiña o home emigrado en América, é agredida unha noite na súa propia casa por un "hombre de mala vida", que para gañar unha aposta e de paso satisfacer a súa libido, violaa sen ningún tipo de escrúpulo e sen facer o menor caso dos seus berros e protestas. Con todo se lemos entre liñas vemos como os romancistas cuestionan a propia honestidade da muller de xeito indirecto, ao insinuar, cunha mordaz e enxeñosa ironía, a súa relación sentimental cun crego: La mujer allí vivía llevando una buena vida sin dar nada que decir ni que jamás se oyera murmurar al vecindario ni del Capellán ni de ella. Ironía que, nun sentido semellante, xa estaba presente anteriormente, ao referirse á profesión do marido: "fabricante de peines y de peinetas construidos con los cuernos de toros y de terneras", e que continuará sendo a perspectiva dominante en toda a composición. Así, no momento en que Xan irrompe no cuarto da muller, ela non se ergue da cama porque "al momento se acuerda que gasta camisa corta y se queda por vergüenza". Os autores pretenden co uso destas estratexias humorísticas converter en cómico un asunto que nun comezo é presentado aparentemente como unha traxedia ( ou máis ben "trijedia" como se lle chama comicamente no poema). Non debía ser tan agresivo e creminal o asaltante nin ela tan casta e pura. Segundo testemuñas que aínda recordan o suceso tal como foi, realmente a honesta e garrida muller, coñecida popularmente no lugar como Dolores da Eiriña, e que efectivamente tiña o marido emigrado en Cuba, era a amante do mozo en cuestión.

Ao parecer, unha noite este presentouse na casa dela anunciándolle que tiñan que romper as relacións, pois pretendía casar con outra rapariga do lugar. Dolores, sen mostrar resentimento, pediulle un último momento de gozo antes da ruptura definitiva. Satisfeito o desexo, e estando o mozo durmido despois de cumprida a tarefa, a muller decidiu que se aquel membro non era para ela tampouco sería para ningunha outra. Colleu entón unha ben afiada navalla de barbear e cortoullo sen vacilación, deixando ao pobre Xan (ou como se chamase) eivado para toda a vida. Ao parecer, posteriormente Dolores presentouse no xulgado de Cuntis ante o secretario, Mario Blanco Torres, irmán de Roberto, portando o pene envolto nun papel, e declarando que fora viola da. Despois dun período de prisión marchou para Buenos Aires, onde ela e mais Severiano, o seu marido, rexentaron durante uns anos un boiante negocio de marmolistería, ata que regresaron á terra. Fillo deles sería un popular boxeador galego coñecido como Suárez. Os feitos producíronse, non na vila de Cuntis como nos conta o romance, senón noutra parroquia do concello, en San Mamede de Piñeiro, no lugar de Montesandeu, e máis concretamente nun magnífico caserón, recentemente restaurado, desde o que se outea todo o val do río Gallo, e que aínda hoxe é coñecido, a pesar de que moitos ignoran o motivo, como *A casa da capadora*.



## COMENTARIOS ENVIADOS

Lo expuesto esta bien en un 98%. Sintácticamente existen algunas diferencias con respecto a lo que yo le oía a Don José Rey Posse con quien me unió una grandísima amistad (para mi, hizo de abuelo adoptivo, ya que los míos habían fallecido siendo yo muy pequeño). Ello ocurría en Pontecesures en donde él era Encargado de Obras del muelle sobre el año 1.965 y comíamos juntos en el Restaurante Loureiro.

La riqueza y la gracia de esta obra es oírla con los fragmentos cantados que van intercalados entre los recitados y que aún hoy recuerdo perfectamente.

[guimarey@telefonica.net](mailto:guimarey@telefonica.net)

Enviado por Jesús Guimarey Mascaró o 03/02/2014 ás 18:39:58